



SUMÁRIU KAZU | VIOLÉNSIA BAZEIA BA JÉNERU

Julju 2013

Iha fulan Julju 2013, Unidade Justisa ba Feto (*Women Justice Unit*) kontinua monitoriza kazu violénsia bázeia ba jéneru iha jurisdisaun tribunál distritál tolu, hanesan Tribunál Distritál Díli, Baucau no Suai.

Iha edisaun ne'e, sei sumárizá julgamentu kazu hamutuk 22. Husi kazu hirak ne'e, kazu 8 mak partensia ba Tribunál Distritál Díli, kazu 6 husi Tribunál Distritál Suai no kazu 8 seluk husi Tribunál Distritál Baucau.

Husi kazu 22 ne'e, kazu 13 mak nu'udar kríme ofensa ba integridade fízika simples ho natureza violénsia doméstika, kazu 2 kona-ba violasaun seksuál, kazu 2 tan kona-ba violasaun seksuál agravadu, kazu 2 seluk kona-ba abuzu seksuál ba menór, kazu 1 kona-ba koasaun seksuál, kazu 1 seluk kona-ba tentativa violasaun seksuál no kazu 1 kona-ba maus tratus ba kónjuje.

Kazu sira ne'e maioria konklui ho pena prizaun maibe suspendidu, esepu ba kazu inestu 2 mak hetan kondensasaun iha prizaun durante tinan 16 no 18. Kazu balun konklui ho pena multa no admoestasasaun. Mesmu nune'e, iha kazu abuzu seksuál 2 hasoru minoridade ne'ebé absolvidu tanba la iha evidensia suficiente.

JSMP konkorda katak tribunál so bele kondena ema ruma ba prizaun kuandu iha elementu prova ne'ebé adekua. Maske nune'e, JSMP mos enkoraza tribunál sira atu halo tratamentu no aprosimasaun ba kazu sira ne'ebé involve labarik iha maneira ne'ebé sensível, konfortavel no seguru liu ba labarik sira tuir sira nia idade no kapasidade atu integra no intende prosesu sira ne'e.

JSMP rejista kazu abuzu sexual ba menór-ne'ebé julga ho Númeru Prosesu: 178//2012/TDDIL iha Tribunál Distritál Díli, hatudu impresaan katak tribunál la-dun ho kuidadu utiliza mekanismu atu hetan evidensia ba kazu ne'e. Iha kazu ne'e tribunál utiliza tekniku "akareasaun" atu konfronta lezada ne'ebé menór ho arguidu ne'ebé nu'udar lezada nia aman rasik. JSMP hanoin katak tekniku no mekanizmu ne'e la seguru no konfortavel ba labarik sira atu sente livre no ses husi presaan hodi koalía iha tribunál.

Tuir mai deskrisaan sumáriu julgamentu kazu ida-idak:

1. Ofensa ba integridade fízika simples ho natureza violénsia doméstika Númeru Prosesu: 153/Crm.S/2013TDB

Juis : Dr. Jose Gonalves
Ministériu Públiku : Dr. Pascacio de Rosa Alves
Defensór Públiku : Dr. Rui Manuel Guterres
Konkluzaan : Kondena ho pena prizaun fulan 6 maibe suspende ba tinan 1

Iha 10 Jullu 2013, Tribunál Distritál Baucau prezide julgamentu leitura sentensa ba kazu ofensa ba integridade fízika simples ho natureza violénsia doméstika. Iha prosesu ne'e, tribunál kondena arguidu ho pena prizaun fulan 6 maibe suspende ba tinan 1.

Ministériu Públiku akuza katak iha 17 Juñu 2010, iha oras maisumenus tuku 12.00, iha Wailili, Baucau, arguidu FIM kaer lezada MFF nia liman hafoin basa dala rua iha lezada nia matan fukun sorin karuk. Aleinde ne'e arguidu mós lori fatuk tuku iha lezada nia hasan loos no tebe dala ida iha lezada nia kotuk laran too lezada monu ba rai.

Kazu ne'e akontese tanba depois ba fase roupa lezada la habai roupa hirak ne'e, maibe lezada ba kedas nia banin nia uma. Situasaun ne'e provoca arguidu hirus no foti tiha kalsa 2 ne'ebé habai iha tali leten no soe tiha roupa seluk ba toos laran.

Bainhira lezada fila ba uma, haré roupa ne'ebé nia fase para hotu iha toos laran no lezada husu tuir semak soe roupa sira, tanba ne'e, arguidu nervoju hodi baku lezada. Aktu ne'e rezulta lezada nia ain no liman fuan kanek tanba tidin-an ba rai.

Ministériu Públiku akuza arguidu kontra artigu 145 kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa totálmente faktu sira iha akuzasaun, maibe deklara katak nia arepende nia hahalok, sira diak malu no atualmente sira hela hamutuk.

Bazeia ba faktus provadu hirak ne'e, tribunál konklui hodi hamonu pena prizaun fulan 6 maibe suspende ba tinan 1.

2. Maus tratus ba kónjuje-Númeru Prosesu: 54/Crm/2013/TDB

Juis	:Dr. Afonso Carmona, Dr. Jose Gonsalves no Dra. Angela Faria Belo (Juiza Internasionál)
Ministériu Públiku	: Dr. Pascacio de Rosa Alves
Defeza	: Dr. Rui Manuel Guterres
Konkluzau	: Kondena ho pena prizaun tinan 2 fulan 6 suspende ba tinan 3, pluz kustu judisial \$ 30.

Iha 9 Jullu 2013 Tribunál Distritál Baucau hala'o julgamentu ba kazu maus tratus ba kónjuje ne'ebé involve arguidu JS hasoru lezada SRX, iha área Beasu, Viqueque.

Ministériu Públiku akuza katak iha 5 Juñu 2012, arguidu lori lezada ba konsulta iha programa "SISCA" ne'ebé hala'o hela tratamentu. Depoisde konsulta, arguidu bolu lezada atu tula ho motor fila ba sira nia uma iha Rai Mean. Maibé lezada lakohi ba tanba nia oin sei halai hela. Tanba ne'e mak arguidu kous obrigatoriamente lezada hodi tula ba motor. Momentu ne'e kedas lezada monu husi motor leten hafoin arguidu basa dala rua iha lezada nia hasan loos no dulas lezada nia liman loos.

Aktu ne'e rejulta lezada nia liman naksalak no hetan tratamentu iha hospital Baucau. Depois akontesementu ne'e, arguidu ho lezada diak malu no moris hamutuk hanesan fen ho laen (uniaunde-faktu). Maisumenus liu tiha fulan 4, iha 19 Outobru 2012, arguidu ho lezada diskuti malu fali no arguidu tuku lezada nia oin to'o hetan kanek no lezada nia matan laran hetan ran.

Durante prosesu audiénsia arguidu deklara loloos faktus sira ne'ebé akuza ba nia.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje konjuga ho artigu 35 Lei Kontra Violénsia Doméstika.

Iha alegasaun finál Ministériu Públiku husu ba tribunál atu kondena arguidu ho pena prizaun tinan 4.

Iha parte seluk defeza husu ba tribunál atu hamenus pena ne'ebé Ministériu Públiku alega tanba durante prosesu arguidu kolabora diak no arguidu mak responsavel úniku ba familia.

Depois avalia faktu sira no rona tiha alegasaun husi Ministériu Públiku no Defeza, tribunál konklui kazu ne'e no kondena arguidu ho pena prizaun tinan 2 fulan 6 maibe suspende ba tinan 3, pluz kustu judisial \$ 30.

3. Ofensa ba integridade fízika simples ho natureza violénsia doméstika-Númeru Prosesu: 73/Crm.S/2013/TDB

Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Kondena ho pena prizaun fulan 6 suspende ba tinan 1, pluz kustu judisial \$20

Iha 10 Jullu 2013 tribunál Distritál Baucau hala'o julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve JG hasoru nia fen CC ne'ebé akontese iha 07 Setembru 2012, iha distritu Viqueque.

Ministériu Públiku akuza katak iha 7 Setembru 2012, iha tuku 10:00 dadersan- vítima bolu/konvida arguidu atu ba aldeia Ratahu. Maibe arguidu la kohi no vítima lori nia oan nain rua mak ba Ratahu. Iha momentu ne'eba, arguidu lao tuir husi kotuk no toman vítima iha mota laran, arguidu tuku dala rua iha vítima nia kabas, tebe dala rua iha kidan no kaer vítima nia fuuk rasta ba iha rai. Vítima sente tauk no hader mai halai ba uma maibé arguidu tuir no kontinua tebe no tuku dala barak iha vítima nia isin lolon.

Aktu ne'e kauza vítima sofre bubu iha matan fukun parte loos, bubu no moras iha isin lolon tomak.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa totalmente faktus ne'ebé Ministériu Públiku akuza ba arguidu, arepende nia hahalok no deklarata katak sei la halo tan iha futuru tantu hasoru nia kónjuje no ema seluk. Depoide rona arguidu nia deklarasaun, tribunál kontinua ho alegasaun finál.

Iha alegasaun finál, Ministériu Públiku husu ba tribunál atu kondena arguidu pena multa US\$ 90. Alegasaun ne'e bazeia ba rendimentu arguidu nian ne'ebé kada fulan hetan maisumenus entre US\$ 15 too US\$ 20.00.

Defeza husu ba tribunál atu aplika pena ne'ebé kaman ba arguidu tanba ho konsiderasaun ba sirkustánsia atenuante sira ne'ebé produz durante julgamentu.

Bazeia faktu provadus sira ne'e, tribunál konklui kazu ne'e no kodena arguidu ho pena prizaun fulan 6 suspende ba tinan 1, pluz kustu judisial \$ 20.00.

4. Ofensa ba integridade fízika simples ho natureza violénsia doméstika Númeru Prosesu: 76/Crm.S/2013/TDB

Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Kondena ho pena prizaun fulan 6 suspende ba tinan 1.

Iha 10 Jullu 2013, Tribunál Distritál Baucau kontinua hala'ó julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve arguidu KHN hasoru nia kónjuje EA, ne'ebé akontese iha 4 Jullu 2012, iha Distritu Viqueque.

Ministériu Públiku akuza katak iha 4 Jullu 2012, arguidu hare vítima baku hela sira nia oan, tanba ne'e arguidu hadau tiha ai-kafe ne'ebé vítima uza hodi baku sira nia oan no baku ba iha vítima nia isin lolon to'o ai-kafe refere tohar. Arguidu mos dudu monu tiha vítima ba iha rai, sama vítima nia ain no dulas vítima nia liman.

Aktu ne'e kauza vítima sofre bubu iha liman, hetan moras iha kanotak no ain.

Ministériu Públiku akuza arguidu kontra artigu 145 Kódigu Penál konaba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa totalménte faktus ne'ebé Ministériu Públiku akuza ba arguidu, arepende nia hahalok, deklara katak sira dame malu ona no sei la halo tan aktu hanesan ba nia kónjuje ka ema seluk.

Tanbá arguidu konfesa faktus totalmente, tribunál kontinua audiénsia julgamentu ho alegasaun finál.

Iha alegasaun finál, Ministériu Públiku husu aplika pena prizaun fulan 3 no suspende ba tinan 1. Alegasaun ne'e bazeia ba faktu provadu sira, maibe konsidera katak arguidu kolabora ho tribunál no kondisaun ekonomi ne'ebé la premite.

Defeza husu ba tribunál atu aplika pena ne'ebé kaman tanba arguidu kopera ho tribunál no husu atu konsidera mos sirkustánsia atenuantes jerál sira ne'ebé produz durante julgamentu.

Depoisode rona tiha alegasaun husi parte sira, tribunál konklui proseseu nee'e hodi kondena arguidu ho pena prizaun fulan 6 suspende ba tinan 1.

5. Ofensa ba integridade fízika simples ho natureza violénsia doméstika-Nú Prosesu :207/Crm.S/2012/TDB

Juis : Dr. Jose Goncalves
Ministériu Públiku : Dr. Baltazar Ramos
Defeza : Dr. Rui Manuel Guterres
Konkluzau : Kondena ho pena prizaun fulan 5 suspende ba tinan 1

Iha 10 Jullu 2013 tribunál Distritál Baucau kontinua hala'ó julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve arguidu FR hasoru FFR hanesan arguidu nia subriña. Kazu ne'e akontese iha 18 Jullu 2012, iha Subdistrito Venilale, Distrito Baucau.

Ministériu Públiku akuza katak iha 18 Jullu 2012, arguidu rona lezada ho nia kolega koalía iha uma laran. Momentu ne'eba arguidu rona katak lezada nia kolega husu atu kaer lezada nia isin.

Depoisde ne'e lezada ba beé matan atu kuru beé. Arguidu tuir ba no husu ba lezada kona-ba tanba sa mak lezada nia kolega husu atu kaer lezada nia isin.

Depois husu tiha hanesan ne'e arguidu baku lezada nia inus to'o ran, tebe dala 2 iha lezada nia ain tur, no arguidu kontinua rasta lezada hodi latan ba rai no kauza lezada hetan kanek iha nia ain tur.

Aktu ne'e kauza lezada hetan kanek iha nia oin, inus ran, no ba tratamentu iha hospital Baucau durante loraun 2.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa totalménte faktus ne'ebé Ministériu Públiku akuza ba arguidu, arepende nia hahalok, deklara mos katak nia iha responsabilidade ba nia subriña no saida mak nia halo hanesan manifesta deit nia deskontentimentu ba lezada.

Tanba sirkunstansia atenuante jeral sira ne'e tribunál fixa hodi aplika pena prizaun fulan 5 suspende ba tinan 1.

6. Ofensa ba integridade fízika simples ho natureza violénsia doméstika-Nú. Prosesu: 142/2013/TDD.

Juis : Dra. Edite Palmira dos Reis
Ministériu Públiku : Dr. Mateus Nessi substitui Dr. Oscar Silva Tavares
Defeza : Dr. Leonidio Marques
Konkluziun : Kondena ho pena multa \$100 pluz kusta judisial U\$ 10.00

Iha 08 Jullu 2013 Tribunál Distritál Díli konklui julgamentu ba kazu violénsia doméstika ho pena multa ba arguidu RG hasoru nia kónjuje AE. Kazu ne'e akontese iha 01 Maiu 2013, husi Sub-Distritu Cristu Rei, Distritu Díli.

Ministériu Públiku akuza katak iha 01 Maiu 2013, maisumenus iha tuku 08:30 kalan, arguidu tuku dala rua iha lezada nia rentos no iha hirus matan, buti iha kakorok no rezulta vítima hetan moras iha hirus matan.

Kazu ne'e akontese tanba arguidu simu telefone husi ema seluk no hetan lezada arguidu desliga telefone. Lezada husu ba arguidu kona-ba telefone ne'e, maibe arguidu nonok sein klarifikasaun. Tanba ne'e, lezada rakut arguidu nia kamiza no arguidu dudu lezada tama ba uma laran no halo ofensa hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensas ba integridade fízika simples konjuga ho artigu 35 alinea b Lei Kontra Violénsia Doméstika.

Iha julgamentu arguidu deklara ba tribunál katak faktus sira balu loos no balu la-loos. Maibé arguidu la klarifika faktus lo-loos ba tribunál. Tanba la iha serteza ba faktus sira ne'e, tribunál konfirma fali ho lezada.

Lezada deklara katak faktus sira ne'e loos hotu. Lezada mós deklara katak arguidu la hela iha uma durante fulan ida resin. Wainhira konfirma ho arguidu, nia deklara katak nia servisu iha distritu.

Iha alegasaun finál, Ministériu Públiku husu ba tribunál atu kondena arguidu ho pena multa. Iha parte seluk, defeza husu ba tribunál atu absolve arguidu tanba arguidu deklarata katak la iha ofensas hasoru lezada. Tanba ne'e, pena multa la relevante iha kazu ne'e.

Depois avalia faktus sira ne'ebé produz iha julgamentu, tribunál konklui hodi kondena arguidu ho pena multa \$100 no sei selu US\$ 1.00 kada loron inklui selu kusta judisial US\$ 10.00.

7. Ofensa ba integridade física simples ho natureza violência doméstica-Nú. Prosesu: 156/2013/TDD

Juis : Dra. Jacinta Correia da Costa
Ministériu Públiku : Dr. Nelson de Carvalho
Defeza : Dr. Juvinal Yanes Freitas no Dr. Leonidio Marques
Konkluziun : Kondena ho pena prizaun fulan 6 suspende pena ba tinan 2

Iha 29 Jullu 2013 Tribunál Distritál Díli konklui julgamentu ba kazu ofensa ba integridade física simple ho natureza violencia domestica ho pena prizaun fulan 6 maibe suspende pena ba tinan 2. Kazu ne'e involve husi arguidu SFE hasoru nia kónjuje NB, iha Distritu Ermera.

Ministériu Públiku akuza katak iha 25 Maiu 2011, tuku 10.00 dadeer, arguidu tuku dala rua iha lezada nia hasan sorin karuk no tebe dala ida iha kotuk laran too monu ba rai. Aktu ne'e rezulta lezada nia tilun hetan ran. Kazu ne'e akontese tanba arguidu husu osan ba lazada atu hola sigaru maibé osan la iha.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alinea (b) Lei Kontra Violência Doméstica.

Iha julgamentu arguidu konfesa no rekoñese faktus ne'ebé maka konsta iha akuzasaun. Lezada mos deklarata ba tribunál katak husi akontesimentu ne'e sira hela separadu durante fulan ida ona. Maibe sira konsege rezolve tuir mekanismu kultural, iha loron 21 Janeiro 2012. Iha prosesu ne'e, arguidu apresenta deskulpa no fo tais ida ba lezada no promete sei la repete iha futuru.

Iha alegasaun finál Ministériu Públiku husu ba tribunál atu aplika suspensaun pena prizaun ba arguidu tanba konsidera arguidu no lezada di'ak malu no hela hamutuk hanesan baibain.

Defeza husu ba tribunál atu fo pena ne'ebé mak la prejudika arguidu nia liberdade.

Bazeia ba faktu provadus hirak ne'e tribunál konklui prosesu ne'e no kondena arguidu ho pena prizaun fulan 6, maibe suspende ba tinan 2 iha liur.

8. Ofensa ba integridade física simples ho natureza violência doméstica: Nú. Prosesu: 176/2013/TDD

Juis : Dra. Edite Palmira dos Reis no Dr. Paulo Duarte Texeira (Juiz Internacional).
Ministériu Públiku : Dr. Nelson de Carvalho
Defeza : Dra. Olga Barreto Nunes
Konkluziun : Omologa

Iha 17 Jullu 2013 Tribunál Distritál Díli hala' o julgamentu ba kazu violénsia doméstika ne'ebé komete husi arguidu MM hasoru nia kónjuje LM, iha Suku Fatubolu, Distritu Ermera.

Ministériu Públiku akuza katak iha 13 Maiu 2010 maisumenus tuku 12.00 meiodia, arguidu buti lezada nia kakorok, tuku dala ida iha hasan no tebe iha kabun, rakut lezada nia fuk no rasta ba rai.

Motivu husi akontesimentu ne'e tanba arguidu nia banin mane sira duni sira sai husi uma, depois iha dadersan fila husi merkadu arguidu ho nia oan lao uluk tia, lezada ba toman sira iha mota laran no sira komesa haksasuk malu.

Ministériu Públiku akuza arguidu kontra artigu 154 Kódigu Penál kona-ba maus tratus ba kónjuje. Maibe tribunál hanoin katak kazu ne'e akontese antes Lei Kontra violénsia Doméstika tama iha vigor, tanba ne'e tribunál kolektivu deside altera tia ba artigu 145 Kódigu Penál kona-ba ofensas ba integridade física simples.

Iha julgamentu arguidu deklar katak faktus balu los no balu lalos. Liu-liu arguidu rejeita katak nia buti lezada nia kakorok. Maibe iha parte seluk lezada kontinua mantein no reforsa katak faktus sira ne'ebé konsta iha akuzasaun Ministériu Públiku nian ne'e los hotu.

Iha alegasaun finál, Ministériu Públiku konsidera katak agora dadaun sira diak malu ona no lezada mos hakarak atu dada fila fali keixa, tanba ne'e husu ba tribunál atu omologa tiha kazu ne'e. Iha parte seluk, defeza husu ba tribunál atu absolve arguidu.

Depois tribunál rona tiha husi Ministériu Públiku no Defeza, tribunál liu husi juis kolektivu deside hodi omologa arguidu husi kazu ne'e.

9. Ofensa ba integridade física simples ho natureza violénsia doméstika-Nú. Prosesu: 0424/2012/TDD

Juis : Dr. Jose Maria de Araújo
Ministériu Públiku : Dr. Vicente Brites
Defeza : Dr. Fernando da Conceição
Konkluzau : Kondena ho pena prizaun fulan 6 suspende ba tinan 1.

Iha 09 Jullu 2013, Tribunál Distritál Díli konklui julgamentu ba kazu ofensa ba integridade física simples ho natureza violénsia doméstika ho pena prizaun fulan 6 maibe suspende ba tinan 1 ba arguidu MX hasoru nia kónjuje AdS, iha Distritu Díli.

Ministériu Públiku akuza katak iha tinan 2012, arguidu tuku iha ulun no lori martelu duni no ameasa lezada.

Kazu ne'e akontese tanbá arguidu fa'an tiha sira nia asu no lezada la konkorda no hakilar malu ho arguidu.

Ministériu Públiku akuza arguidu kontra artigu 145 Kódigu Penál kona-ba ofensas ba integridade física simples no konjuga ho artigu 35 alinea b Lei Kontra Violénsia Doméstika.

Iha julgamentu arguidu konfesa ba tribunál katak faktus sira ne'ebé konsta iha akuzasaun Ministériu Públiku nian ne'e lo'os hotu. Arguidu arepende nia hahalok sira no promete sei la repete iha futuro.

Konsidera katak arguidu faktu konfisaun no arependementu husi arguidu, Tribunál husu ba Ministériu Públiku la presiza rona lezada, maibé Ministériu Públiku argumenta katak kazu ne'e

akontese iha nivel familia tanba ne'e presiza halo klarifika ba lezada kona-ba prosesu no krime nia natureza. Tanba iha inkeritu Ministériu Públiku nian, lezada husu dezisténsia ba kazu ne'e tuir deklarasaun ne'ebé junta iha autus.

Iha alegasaun finál Ministériu Públiku husu ba tribunál atu kondena arguidu ho pena admoestasau.Husi parte defeza husu ba tribunál atu fo pena ne'ebé justu ba arguidu.

Bazeia ba avaliasaun ba faktus hirak ne'ebé produs husi audensia julgamentu tribunál konklui hodi kondena arguidu ho pena prizaun fulan 6 maibe suspende ba tinan 1.

10. Violasaun seksuál- ho Nú. Prosesu: 630/2012/TDD

Juis : Dr. Jose Maria de Araújo (representa juis kolektivu)
Ministériu Públiku : Dra. Ivonia Maria Guterres
Defeza : Dra. Laura Valente Lay
Konkluzau : Kondena ho Pena prizaun tinan 16.

Iha 22 Jullu 2013 Tribunál Distritál Díli kondena arguidu ne'ebé komete krime violasaun seksuál agravadu hasoru nia oan-hakiak ba tinan 16 iha prizaun. Kazu ne'e konsidera nu'udar violensia seksuál ho natureza inestu tanba involve membru ne'e sei iha relasaun familia. Inestu mak krime violasaun seksuál ida ne'ebé involve membru familia rasik no ema sira ne'ebé iha autoridade familia no vítima dependensia ba ema hirak ne'e.

Krime ne'e mos ho natureza violénsia doméstika tanba arguidu mak vítima nia padrastu rasik no sira hela hamutuk.

Ministeriu Públiku akuza katak arguidu prátika violasaun seksuál kontra lezada dala rua. Primeriu iha 13 Setembru 2011 no segundu iha 14 Dezembru 2011 no kauza lezada hetan isin rua.

Ministériu Públiku akuza arguidu kontra artigu 178 Kódigu Penál kona-ba abuzu seksuál ba menór, maibé tribunál altera tiha ba artigu 172 ho 173 alinea (d) Kódigu Penál kona-ba violasaun seksuál agravadu konjuga ho artigu 35 alinea (b) Lei Kontra Violénsia Doméstika.

Arguidu konfesa ba tribunál katak akuzasaun loos hotu no lezada deklara katak faktu sira ne'e loos.^[1]

11.Ofensa ba integridade física simples ho natureza violénsia doméstika -Número Prosesu: 60/2013/TDB

Juis : Dr. José Gonçalves
Ministériu Públiku : Dr. Baltazar Ramos
Defeza : Dr. Rui Manuel Guterres
Konkluzau : Kondena ho pena multa \$.45

Iha 31 Jullu 2013, Tribunál Distritál Baucau prezide leitura sentensa ba kazu kríme ho natureza violénsia doméstika. Kazu ne'e envolve arguidu MdC hasoru lezada JS, iha Distritu Baucau

[1] Favor lee pozisaun JSMP nian iha komunikadu imprensa edisaun 25 Jullu 2013 ho titlu: "Tribunál kondena tinan 16 ba kazu inestu", iha webiste JSMP: www.jsmp.tl

Ministériu Públiku akuza katak iha dia 29 Novembru 2011, maisumenus 7.00 kalan, arguidu tuku iha lezada nia kotuk laran, soku lezada nia matan sorin karuk dala rua, no dudu monu ba rai. Motivu husi akontesemmentu ne'e tanba vitima ba iha vítima nia avo ninia uma sein kuñesementu husi arguidu.

Tribunál konsidera faktus sira iha akuzasaun provadu bazeia artigu 145 Kódigu Penál kona-ba ofensas ba integridade fízika simples konjuga ho artigu 35 alinea (b) Lei Kontra Violénsia Doméstika.

Tanba ne'e, tribunál konklui prosesu ne'e hodi kondena arguidu ho pena multa \$.45 no kada loron selu \$.0.50 to'o loron 90 nia laran. Wainhira arguidu la kumpri pena multa ne'e nia sei hetan pena prizaun loron 60.

12. Ofensa ba integridade fízika simples ho natureza violénsia doméstika -Número Prosesu: 57/2012/TDB

Juis : Dr. José Gonçalves
Ministériu Públiku : Dr. Baltazar Ramos
Defensór Públiku : Dr. Rui Manuel Guterres
Konkluzau : Kondena ho pena prizaun fulan 3 maibe suspende ba tinan 1.

Iha 31 Jullu 2013, Tribunál Distritál Baucau prezide julgamentu no kondena arguidu ba kazu ofensa ba integridade fízika simples ho natureza violénsia doméstika ho pena prizaun fulan 3 maibe suspende ba tinan 1. Kazu ne'e envolve arguidu MS hasoru lezada AF hanesan nia konjuje, ne'ebé akontese iha Distritu Vique.

Ministeriu Públiku akuza katak iha 2011, lezada sai husi uma durante fulan lima tanba arguidu baku tohar hotu kedeira iha uma. Wainhira lezada fila-fali ba sira nia uma, arguidu tuku iha kotuk laran, basa no dudu monu ba rai.

Ministériu Públiku akuza arguidu kontra artigu 145 Kódigu Penál kona-ba ofensas ba integridade fízika simples.

Depois avalia faktus ne'ebé produz durante julgamentu, tribunál prova katak arguidu komete duni kríme ofensas ba integridade fízika simples, ne'ebé akuza hasoru nia.

Bázeia ba faktus provadu sira, tribunál kondena arguidu ho pena prizaun fulan 3 suspende ba tinan 1.

13. Ofensa ba integridade fízika simples ho natureza violénsia doméstika -Número Prosesu: 24/2012/TDB

Juis : Dr. José Gonsalves
Ministériu Públiku : Dr. Baltazar Ramos
Defensór Públiku : Dr. Rui Manuel Guterres
Konkluzau : Kondena ho pena prizaun fulan 3 suspende ba tinan 1.

Iha 31 Jullu 2013, Tribunál Distritál Baucau prezide no konklui julgamentu ba kazu krime ofensa ba integridade fízika simples ho natureza violénsia doméstika ne'ebé envolve arguidu CdS hasoru

lezada AV hanesan nia kónjuje. Iha julgamentu ne'e tribunál konklui no kondena arguidu ba fulan 3 maibe suspende ba tinan 1. Kazu ne'e akontese iha 30 Novembru 2011, iha Distritu Lospalos,

Ministeriu Públiku akuza katak iha 30 Novembru 2011, arguidu diskuti malu ho lezada no arguidu basa no tuku-tebe lezada dala ida. Aktu ne'e kauza lezada nia liman kabun moras no bubu. Kazu ne'e akontese tanba arguidu diskunfia lezada namora ho mane seluk.

Ministériu Públiku akuza arguidu kontra artigu 145 Kódigu Penál kona-ba ofensas ba integridade fízika simples.

Depois avalia faktus ne'ebé produz durante julgamentu, tribunál prova katak arguidu komete duni kríme ofensas ba integridade fízika simples ne'ebé akuza hasoru nian.

Bázeia ba faktus provadu hirak ne'e, tribunál decide hodi kondena arguidu ho pena prizaun fulan 3 suspende ba tinan 1.

14. Violaun Seksuál agravadu-Númeru Prosesu: 97/2013/TDB

Juis : Dra. Angela B. Virgilio, Dr. Afonso Carmona no Dr. José Gonçalves
Ministériu Públiku : Dr. Baltazar Ramos
Defensór Públiku : Dr. Grigorio de lima
Konkluzau : Kondena ho pena prizaun tinan 18

Iha 31 Jullu 2013 Tribunál Distritál Baucau kondena pena prizaun tinan 18 ba arguidu ne'ebé komete krime violaun seksuál agravadu hasoru ninia oan rasik.

Tribunál prova katak arguidu prátika violaun seksuál kontra lezada dala rua iha 28 Novembru 2012 no 26 Dezembru 2012. Krime ne'e involve natureza incestu no violénsia doméstika tanba arguidu nu'udar vítima nia aman rasik.

Ministériu Públiku akuza arguidu kontra artigu 172 Kódigu Penál kona-ba violaun konjuga mós ho artigu 173 alinea (a) Kódigu Penál kona-ba violaun seksuál agravadu.

Iha julgamentu, arguidu konfesa ba tribunál katak akuzasaun loos hotu no lezada deklara katak faktu sira ne'e loos.

Depoisde avalia faktu sira relasiona ho kazu ne'e tribunál konklui hodi kondena arguidu ho pena prizaun tinan 18 nia laran^[2].

15. Abuzu seksuál ba menór-Nú. Prosesu: 352/2012/TDD

Juis :Dr. José Maria de Araújo
Ministériu Públiku :Dr. Mateus Nessi
Defensór Públiku :Dr. Lino Lopes (Advogadu Privadu)
Konkluzau :Kondena ho pena prizaun tinan 9

[2] Favor lee mos komunikadu imprensa JSMP nian edisaun 7 Agostu 2013 relasiona ho kazu ne'e no pozisaun JSMP nian; iha website JSMP: www.jsmp.tl

Iha 25 Jullu 2013 Tribunál Distritál, Díli hala'o julgamentu ba kazu abuzu seksuál ba menór ne'ebé komete husi arguidu MM hasoru nia aluna SdC. Kazu ne'e akontese iha Distritu Dili.

Ministeriu Públiku akuza arguidu prátika violasaun seksuál kontra lezada ne'ebe sei iha tinan 13. Iha akuzasaun ne'e haktuir katak maizumenuz iha tinan 2012, arguidu bolu lezada no nia maun ba mota laran hodi buka aimoruk matenek ninia. Hafoin arguidu ho lezada sae ba foho leten, arguidu komesa kaer lezada ninia susun, hasai ropa ho forsa, no halo relasaun seksuál. Aku ne'e rezulta lezada hetan kanek iha ninia orgaun seksuál.

Ministériu Públiku akuza arguidu kontra artigu 177 Kódigu Penál kona-ba abuzu seksuál ba menór, maibé tribunál altera tiha ba artigu 182 alinea 1 Kódigu Penál kona-ba agravasaun.

Depois avalia faktus ho sirkunstansia sira hotu, tribunál konklui no kondena arguidu ho pena prizaun tinan 9.

16. Violasaun seksuál -Númeru Prosesu: 114/PEN/2013/TDS

Juis : Dr. Costansio Baros Basmery
: Dr. Pedro Raposo de Fiquieredo (juis internasionál)
: Dra. Florencia Freitas.
Ministériu Públiku : Dr. Felisminio Cardoso no Dra. Benvinda da Costa Rosario
Defeza : Dr. Marcal Mascarinhas no Dr. João Henrique (Defensoria Públiku)
Konkluzau : Suspende hodi hein leitura akordaun iha 6 Agostu 2013.

Iha 24 Jullu 2013 Tribunál Distritál Suai, liu husi tribunál movél hala'o julgamentu ba kazu violasaun seksuál. Kazu ne'e envolve arguidu AN hasoru lezada RdR (matebian) ona, husi Soru-kraik, Distritu Ainaro.

Ministériu Públiku akuza katak iha tinan 2007, arguidu bolu lezada ba kuartu ameasa ho tudik no hatu ba lezada iha kama leten no pratika violasaun seksuál no kauza lezada sofre ran sai barak.

Depois de akontesimentu lezada tauk no dehan ba testamuña LdR katak nia hakarak halai fila ona ba =nia inan-aman iha Soru-kraik Ainaro. Wainhira fila tiha ba nia uma lezada informa kazu ne'e ba familia no lider komunitariu. Arguidu mak nu'udar responsavel ba grupu "KALUR" (Kldestina Atan Libertasaun Uluk Rezistencia) Grupun ne'e hari'i hodi motiva jovem sira ba tuir formasau iha Osnako-Mandelu.

Ministériu Públiku akuza arguidu kontra artigu 172 Kódigu Penál kona-ba violasaun.

Iha julgamentu arguidu rekuza faktus sira ne'ebé imputa ba nia iha akuzasaun Ministériu Públiku katak akuzasaun ne'e laloos. Maibe deklarata katak nia organiza duni jovem sira inklui lezada ba Osnako.

Iha parte seluk, lezada nia inan-aman depoimenta katak lezada fila husi Osnako-Mandelu informa ba sira katak arguidu viola tiha ona nia. Tanba ne'e, familia no lider komunitariu sira bolu arguidu husi Osnako atu rezolve, maibe arguidu la kolabora. Hafoin familia no xefe aldeia sira entrega ba polisia.

Tuir mai lider komunitariu deklarata katak nia simu informasaun kona-ba akontesementu ne'e husi lezada no nia inan-aman wainhira sira ba halo denúnsia. Nune'e mós membru PNTL ne'ebé

hanesan testamuña deklara mos katak nia iha koñesementu ba kazu ne'e maibe depoisde lezada no familia ba halo denunsia.

Arguidu atualmente iha idade tinan 42, iha fen nain tolu. Fen primeiru iha oan 10, fen segundu oan 11 no fen terseiru iha oan 5. Arguidu nu'udar agrikultor. Arguidu nia fen nain rua hela iha Sorukraik no ida boot hela iha Osnako-Mandelu, arguidu rasik hela iha prizaun preventiva hahu tinan inisiu 2013.

Iha alegasaun finál Ministériu Públiku kontinu mantein faktu sira katak violasaun ne'e no aktu grave teb-tebes. Tanba ne'e, husu ba tribunál atu kondena arguidu ho pena ne'ebé lamenus husi tinan 10.

Iha parte seluk, defeza argumenta katak tuir prinsipiu kontraditoriu, kondenasau so akontese bazeia ba produzaun materia prova ne'ebé mai husi parte sira no depoimentu testamuña sira nian. Defeza hanoin katak iha kazu ne'e tribunál iha pozisaun ne'ebé la klaru no iha dúvida nia laran.

Tuir prinsipiu "induvio proreo" katak wainhira tribunál dúvida tribunál tenke absolve arguidu husi krime ne'e. Mesmu nune'e, se konsidera iha prova adekuada tribunál bele kondena arguidu.

Hafoin rona tiha alegasaun husi Ministeriu Públiku nodefezatribunál marka fali agenda leitura akordaun iha 6 Agosto 2013, maisumenuz iha tuku 09:00 dadeer, iha Tribunál Distritál Suai.

17. Ofensa ba integridade fízika simples ho natureza violénsia doméstika-Nú. Prosesu: 87/PEN/2013/TDS

Juis : Dr. Florencia Freitas
Ministériu Públiku : Dra. Benvinda da Costa
Defeza : Dr. Marçal Mascarinhas
Konkluzau : Kondena ho pena multa \$.30 no kustu judisial \$.10

Iha 25 Jullu 2013 Tribunál Distritál Suai liu husi julgamentu movél julga no kondena pena multa ba krime ho natureza violénsia doméstika. Kazu ne'e involve arguidu AS pratika krime hasoru nia kónjuje PN, iha Distritu Manufahi.

Ministériu Públiku akuza katak iha 8 Maiu 2012, arguidu tuku iha lezada nia rentos halo ran sai, bubu no moras. Agresaun ne'e halo lezada ba tratamentu iha hospital.

Kazu ne'e akontese tanba wainhira arguidu fila husi servisu hahan meudia seidak pronto. Tanba ne'e ho nervozu arguidu hamonu tiha telefone no arguidu ho lezada deskuti malu no kauza halo ofensa hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuja ho artigu 35 Lei Kontra Violénsia Doméstika.

Iha julgamentu arguidu konfesa faktu sira no deklarasaun ne'e han-malu ho depoimentu lezada nian. Maibe arguidu mos deklara katak sira dame malu ona no durante ne'e laiha problema no arguidu arepende nia hahalok.

Arguidu hanesan funcionariu seguransa sivil, ho vensimentu servisu nian \$140 no responsavel ba oan nain 4 ne'ebé sei ki'ik.

Iha alegasaun finál Ministériu Públiku konklui katak faktus hotu provadu tanba ne'e husu ba tribunál atu aplika multa.

Husi defeza rekoñese katak faktus sira ne'ebé produz hatudu duni arguidu nia involvimentu, maibé arguidu moris ho vensimentu ne'ebé la sufisiente atu sustenta nia familia, tanba ne'e husu ba tribunál aplika pena suspensaun ba arguidu.

Bazeia ba faktu produz no alegasaun husi parte sira, tribunál kondena arguidu pena multa \$ 30 no kada lora sei selu \$. 0.50. Tribunál mos kondena arguidu selu kustu judicial \$.10.

18. Ofensa ba integridade fízika simples ho natureza violénsia doméstika -Número Prosesu: 144/PEN/2013/TDS

Juis :Dr. Constancio Barros Basmerly
Ministériu Públiku :Dr. Dra. Benvinda da Costa
Defeza :Dr. Marçal Mascarenhas no Dr. João Hendrique
Desizaun :Kondena ho pena prizaun fulan 6 maibe suspende ba tinan 1.

Iha 25 Jullu 2013 Tribunál Distritál Suai atraves husi julgamentu movél kondena pena prizaun fulan 6 maibe suspende ba tinan 1 tanba komete ofensa ba integridade fízika simples ho natureza violénsia doméstika. Kazu ne'e involve arguidu DGX hasoru RM nu'udar aguidu nia feen. Kazu ne'e akontese iha Lesu-Hatudu, Distrito Ainaro.

Ministériu Públiku akuza katak iha 27 Abril 2013, arguidu tuku no tebe dala ida iha lezada nia kelen. Tanba ne'e lezada nervoza foti besi kanu ida atu baku hasoru arguidu, maibe sira hadau malu besi ne'e no besi refere kona iha lezada matan fukun no rezulta hetan kanek no ran fakar.

Kazu ne'e akontese tanba arguidu sama lezada nia-ain no lezada la kontente no ko'alia barak.

Ministériu Públiku akuza arguidu kontra artigu 145 Kódigu Penál konjuga artigu 35 Lei Kontra Violénsia Doméstika.

Iha julgamentu arguidu konfesa total faktus ne'ebé konsta iha akuzasaun no han-malu ho depoimentu husi lezada. Maibe arguidu no lezada deklar ba tribunál katak sira di'ak malu ona, moris hamutuk, iha oan nain rua no servisu hanesan agrikultor hodi sustenta sira nia familia.

Iha alegasaun finál Ministériu Públiku husu ba tribunál atu kondena arguidu ho pena prizaun fulan 6 maibe suspende pena ba tinan 1.

Defeza konkorda ho Ministériu Públiku kona-ba suspensaun ba pena prizaun, maibé husu ba tribunál atu fó pena fulan 3 no suspende ba fulan 6.

Tribunál konklui no termina kazu ne'e hodi kondena arguidu ho pena prizaun fulan 6 maibe suspende ba tinan 1.

19. Koasaun seksuál -Número Prosesu: 144/PEN/2013/TDS

Juis : Dr. Pedro Raposo de Fiquieredo (juis internasionál)
: Dr. Constansio Baros Basmerly
: Dra. Florencia Freitas.
Ministériu Públiku : Dr. Felisminio Cardoso (prokuradór internasionál)
: Dra. Benvinda da Costa Rosario

Defeza : Dr. Marçal Mascarenhas no Dr. João Hendrique (husi defensoria públiku)
Konkluzau : Kondena ho pena prizaun tinan 2 fulan 2 no suspende ba tinan 4.

Iha 26 Jullu 2013 Tribunál Distritál Suai liu husi julgamentu movél aplika suspensaun ba pena prizaun ba arguidu krime koasaun seksuál. Krime ne'e involve arguidu AP pratika tentativa koasaun seksuál hasoru lezada NdC, iha Leolima Hatudu-Ainaro.

Ministériu Públiku akuza katak iha 13 Agosto 2012 arguidu kaer lezada nia liman maibe lezada hisik no halai. Arguidu duni tuir lezada no lezada monu, arguidu tur iha leten. Maibe lezada kontinua esforsa an atu halai ses husi arguidu no tata arguidu nia liman fuan kanek no lezada halai ses husi arguidu. Arguidu lori fatuk duni tuir to'o uma no amesa katak sei sunu tiha lezada nia-uma iha kalan.

Ministériu Públiku akuza arguidu kontra 171 Kódigu Penál kona-ba koasaun seksuál.

Iha julgamentu arguidu rekoñese faktus iha akuzasaun los. Arguidu kaer duni lezada nia liman, tuda tuir lezada, tur iha lezada nia kidan no amiasa atu sunu lezada nia uma. Maibe iha tempu hanesan arguidu deklarata katak nia arepende nia hahalok.

Iha alegasaun finál, bazei ba faktu provadu sira, Ministériu Públiku husu ba tribunál atu kondena arguidu. Iha parte seluk, defeza argumenta katak bazeia konfisaun arguidu, manifesta arependimentu, kolaborasaun iha prosesu hanesan sirkúnstansia ne'ebé atenua (hakman) arguidu, tanba ne'e husu ba tribunál aplika suspende arguidu husi pena prizaun.

Bázeia ba faktus hirak ne'e, no krime ne'ebé arguidu komete mak hanesan krime amesa no tentativa koasaun seksuál tribunál konklui ho pena tinan 2 fulan 2 prizaun, maibe suspende pena ba tinan 4. Tribunál mos bandu arguidu atu besik lezada durante periodu ne'e.

20. Tentativa violasaun seksuál-Nú. Prosesu:146/PEN/2013/TDS

Juis : Dr. Constansio Baros Basmerly
: Dr. Pedro Raposo de Fiquieredo (juis internasionál)
: Dra. Florencia Freitas.
Ministériu Públiku : Dr. Felisminio Cardoso (Prokuradór Internasionál)
: Dra. Benvinda da Costa Rosario
Defeza : Dr. Marçal Mascarenhas no Dr. João Hendrique (Defensoria Públiku)
Konkluzau : Absolvidu

Iha 24 Jullu 2013 Tribunál Distritál Suai liu husi julgamentu movél absolve arguidu krime tentativa violasaun. Krime ne'e involve arguidu LM hasoru lezada LdA, iha Distritu Ainaro.

Ministériu Públiku akuza katak iha 27 Marsu 2013 tuku 11:00 kalan, arguidu lori tudik selok odamatan tama uma laran no tenta atu viola lezada.

Ministériu Públiku akuza arguidu kontra 172 Kódigu Penál kona-ba violasaun no artigu 23 Kódigu Penál tentativa.

Iha julgamentu arguidu hili direitu silensiu. Lezada ho testamuña nia depoimentu kontrariu.

Iha alegasaun finál, Ministériu Públiku haktuir katak faktus ne'ebé lezada no testamuña la han-malu, tanba ne'e husu ba tribunál decide tuir lei.

Iha parte seluk, defeza argumenta katak bazeia prosesu produsaun prova ne'ebé halao durante julgamentu la hatudu faktus ruma ne'ebé suficiente atu kondena arguidu, tanba ne'e, husu ba tribunál atu absolve arguidu.

Bázeia ba prosesu, faktus ne'ebé produz no alegasaun husi parte sira, tribunál konklui prosesu no absolve arguidu.

21. Ofensa ba integridade fizika simples ho natureza violénsia doméstika-Nú. Prosesu: 0060/2012/TDDIL.

Juiz : Dr. Jose Maria de Araujo.
Ministériu Públiku : Dra. Gloria Alves (Prokuradora internasionál)
Defeza : Dr. Leonidio Marques (Defensor Públiku estagiadu)
Konkluzau : Kondena fulan 6 prizaun suspende ba tinan 1 no selu kusta judisial \$.10

Iha 30 Jullu 2013 Tribunál Distritál Díli kondena arguidu ne'ebé prátika krime violénsia doméstika hasoru nia kónjuje ho pena prizaun fulan 6 no suspende ba tinan 1, pluz kustu judisial \$10.

Ministériu Públiku akuza katak 18 Maiu 2012 arguidu basa dala ida iha lezada nia hasan karuk. Kazu ne'e akontese tanba arguidu husu osan \$.50 ba lezada atu selu sira-nia oan nia eskola no lezada lori osan mai soe deit ba arguidu.

Ministériu Públiku akuza arguidu kontra artigu 145 Kódigu Penál kona-ba ofensas ba integridade física simples no konjuga ho artigu 35 alinea b Lei Kontra Violénsia Doméstika.

Iha julgamentu arguidu konfesa totalmente faktus husi akuzasaun, Ministériu Públiku husu atu kontinua prosesu no la presiza rona tan depoimentu husi lezada.

Iha alegasaun Ministériu Públiku katak arguidu konfesa faktus tanba ne'e husu ba tribunál aplika pena multa. Husi parte defeza argumenta katak pena multa la reflata ho arguidu nia kondisaun. Arguidu iha oan 6, konfesa faktus sira, delikuyente primariu, konsiliasaun antes ho lezada, kondisaun ekonomia fraku, tanba ne'e defeza husu ba tribunál atu aplika pena admoestasaun.

Bázeia ba faktus ne'ebé produz durante julgamentu no tribunál avalia provadu, konklui hodi kondena arguidu fulan 6 prizaun suspende pena ba tinan 1 no selu kusta judisial US\$ 10.

22. Abuzu seksual ba menor-Númeru Prosesu: 178//2012/TDDIL

Juis : Dr. Antoninho Gonçalves representa juis koletivu
Ministériu Públiku : Dr. Jose Luis Landim
Defensór Públiku : Dra. Marcia Sarmiento
Desizaun : Absolvidu

Iha 30 Jullu 2013, Tribunál Distritál Díli hala'o leitura akordaun ba kazu abuzu seksuál ne'ebé involve arguidu ne'ebé nu'udar aman hasoru nia oan rasik.

Ministériu Públiku akuza arguidu katak, iha tinan 2010 arguidu prátika aktu abuzu seksuál ba lezada iha dapur no tuir fali iha kuartu laran. Aktu ne'e akontese wainhira lezada sei iha tinan 10.

Durante julgamentu arguidu nega totál faktus ne'ebé akuza hasoru arguidu no lezada mos deklarata katak faktu sira iha akuzasaun la loos.

Testemuña ne'ebé nu'udar lezada nia inan haktuir katak nia rona husi lezada konta ba nia katak arguidu komete duni aktu abuzu seksuál hasoru lezada.

Tanba faktu sira ne'e kontrariu ba malu, tribunál decide halo "akareasaun" entre testemuña, lezada no arguidu. Akareasaun" hanesan tipu prova ida iha tribunál ne'ebé juís husu testemuña hanesan konfrontasun sira-nia faktu ka deklarasaun.

Depois hala'o tiha prova akareasaun, tribunál nafatin iha dúvida, tanba ne'e tribunál absolve arguidu.

JSMP hein katak iha futuru tribunál sei sensivel atu utiliza mekanismu no aprosimasaun ne'ebé seguru no konfortavel liu ba labarik. Bainhira labarik envolve iha kazu hanesan vítima ka sasin, tribunál labele hala'o julgamentu ho maneira ne'ebé hanesan ba ema adultu. Tribunál tenke proteje labarik husi trauma no aplika teknika no mekanismu atu hetan prova ne'ebé adekua ba labarik tuir sira-nia kapasidade.

Sumariu ne'e produz tanba apoiu finansieru husi Embaixada Noruega iha Jakarta.

Atu hetan informasaun liu tan bele kontaktu direktamente ba:

Luis de Oliveira Sampaio
Diretór Ezekutivu JSMP
Diresaun e-mail : luis@jsmp.minihub.org
Telefone : (+670) 3323882/77295795
Website : www.jsmp.tl
Face book : [jsmp.timorleste](https://www.facebook.com/jsmp.timorleste)